

Motorafgiftimut suliassat, allaffissornikkut, akiliisitsisarnermullu akisussaaffik kommunenut tunniunneqarpat sutigut sumiiffinni iluaqutaasinnaanersut pillugu Inatsisartunut apeqquteqaat aallaavigalugu oqallisissiaq.

(Inatsisartunut ilaasortaq Aqqalu C. Jerimiassen, Atassut)

Akissuteqaat

(Aningaasaqarnermut Naalakkersuisoq)

Aallarniutigalugu Naalakkersuisut sinnerlugit Inatsisartunut ilaasortaq Aqqalu C. Jerimiassen, Atassut, oqallinneq manna aallartimmagu qujaffigaara.

Ukiut tamaasa qamutininut motorilinnut akileraarutinit 80 mio. kr.-t missaat akileqquneqartarput. Qamutit motorillit akileraarutaat akitsuutit allat assigalugit nunatta karsianut nakkartinneqartarput.

2000 sioqqullugu kommuninut ataatsimoortumik tapiissutini makkununnga atugassanik immikkut aningaasanik immikkoortitsisoqartarpoq "Aqquserngit, eqqakkat kuuffii, allaffissorneq, iliveqarfiit il.il.". Ilaatigut suliassat kommuninit isumagineqartut akornanni pingaarnersiuinissamut kommunit kiffaangissuseqarnerulersinniarlugit aningaasat atugassanngortinneqarfii atorunnaarsinneqarput. Kommunit ilaat kommuninut allanut sanilliullutik aqutissaminnik qaffasinnerusumik pingaarnersiuinissamik toqqaanissaat ilimagissallugu pissusissamisoorinarpoq. Tamanna najukkami nammineq aqutsinissami innuttaasunullu qanilaartuunissami tunngavissarisanut naapertuulluarpoq.

Kommunit aningaasaqarnerat tatineqartoq aamma taama tatineqarneq pissutigalugu kommunit sumiiffinni tamani aqquserngit pitsaasuutinnissaannik salliutitsiniarnerat sumiiffinni amerlasuuni ajornakusoortinneqartoq siunnersuuteqartumit oqaatigineqarpoq.

Qamutininut motorilinnut akileraarummik akiliisitsisarnerup kommuninut tunniunneqarneratigut kommunit aningaasaqarnerata ataatsimut isigalugu nukittortinneqarsinnaanera Naalakkersuinit isumaqatigineqanngilaq.

Siullertut kommuninut tunniussinerup nassatarissavaa kommuninut ataatsimoortumik tapiissutit 80 mio. kr.-t missaannik ikilineqassammata. Aappaatut akileraarummik akiliisitsiniarnerup isumagineqarnissaanut kommunit tallimaasut tamarmik immikkut allaffissornikkut immikkoortortamik ineriikkiartortitsisariaqassapput. Ullumikkut suliassaq tamanna Akileraartarnermut Aqutsisoqarfimmi ukioq naallugu sulisorisanit marluk missaanniittunik isumagineqartarpoq. Aamma pingajuattut kommunini ataasiakkaani qamutit qanoq amerlatigisut nalunaarsorneqarsimanerat assigiinngitsorujussuummat kommunit isertitatut angusassaat annertoorujussuarmik assigiinngissuseqassapput.

Kommunit aningaasanik amerlanerusunik pilersorneqarnissaat siunnersuuteqartup anguniagarivippagu tamatuma ataatsimoortumik tapiissutinut assigisaannulluunniit atatillugu oqallisigineqarnissaa tulluarnersuaq. Matumanili eqqaamaneqassaaq aningaasat arlaanniit pissarsiarineqartussaammata. Ataatsimoortumik tapiissutit qaffanneqarpata tamatumani pisariaqassaaq qaffasinnerusunik akileraarusiinissaq akitsuusiinissarlu imaluunniit suliassat allat pingaarnersiunnginnissaannut naalakkersuinikkut amerlanerussuteqarnermik pilersitsinissaq. Maanna inissisimaneq tunngavigalugu aqqut tamanna ingerlaffigineqarsinnaanngitsut Naalakkersuisunit isigineqarpoq.

Naggasiullugu oqaatigineqassaaq siunnersuut piviusunngortinneqassappat siunnersuuteqartup akerlerisaa iliuuserisariaqassavarput; siammasissumik inissitsiteriniaannarluni siammasissumik inissitsiterineq.

Taama oqaaseqarlutik inersuarmit pissanganartumik oqallinnissaq Naalakkersuisut qilanaaraat.